



# Cook Islands Christian Church

## NEWSLETTER NUMER 13

(published 26 September 2007)

**CICC Vision:** "To worship and serve God, and to make Jesus known to all people. Ko te akamori e te tavini i te Atua na roto i te akakiteanga ia Iesu Mesia ki te au tangata ravarai."

E Nuti Evangelia na te Akonoanga Keresitiano o te Kuki Airani (CICC) ki te au:

- ✓ Tavini rave angaanga katoatoa i roto i te au Ekalesia CICC i te Kuki Airani nei, Nuti Reni, Autireria e Tahiti
- ✓ Mema CICC katoatoa i roto i te au Ekalesia tatakitai
- ✓ Taeake ma te au tuaine i roto i te akarongo

### I ROTO I TEIA NUTI LETA:

- ★ Uipaanga Maata 2007
- ★ Opati Ou i Takamoa
- ★ Tere no Tetautua Ekalesia
- ★ Nuti mei te Ekalesia Mt. Sheridan
- ★ Uipaanga na te Pacific Conference of Churches
- ★ Tuatua no te tiakianga meitaki o te moni a te Ekalesia
- ★ Tere o te Tekeretere Maata ki Nuti Reni
- ★ Buka e okoia nei i Takamoa
- ★ Akapapaanga Tuatua no te au Vaeau o te Atua

**ANY COMMENTS?** Send to CICC Administration on: [adminpub@oyster.net.ck](mailto:adminpub@oyster.net.ck)

# CICC NUTI LETA 13

*Akapapaia e Nga Mataio, Tekeretere Maata*

## 1. AKATOMO'ANGA

Ei akatomo ia tatou ki roto i teia nuti leta, te na ko ra te irava mua o te reo imene Apii Sabati numero 188;

*Tei mua ia tatou te akairo aroa  
Ta lesu te Atu i oronga mai  
Kia kore e ngaro ia tatou katoa  
Tona ra aroa, i vaooia mai ei*

Kia orana akaou e taku au taeake rave angaanga i roto i te Atu, pera kotou e te au mema i roto i te akarongo, to kotou au tokorua e pera te anau katoatoa. E tau ia tatou kia akameitaki i te mana katoatoa koia tei oronga mai i teia tikaanga manea kia aravei akaou tatou na roto i teia pepa akakitekite no te 13 o te taime.

Me e au nuti ta kotou tei anoano kia tauruia ki roto i teia au tataanga ki mua, tuku mai kiaku me kore ki to tatou opati i Takamoā. Kia tika katoa akatotoa iatu teia karere ki to kotou au taeake kia kite katoa ratou i te tupu nei i roto i ta tatou akonoanga CICC. Ko kotou kare i kite ana i te au nuti leta i mua atu e kua anoano kotou kia kite, aravei atu i te Orometua o taau Ekalesia me kore akakite mai kiaku; ka rauka oki te reira au nuti leta i te tuku iatu na runga i te emere (email).

## 2. UIPAANGA MAATA 2007

### Akamaramaanga

E ripoti poto teia no te uipaanga maata a te CICC tei rave iatu i te marama Tiurai i topa, ei tatauanga na te maataanga o te au mema CICC i roto i nga Ekalesia i te Kuki Airani nei, Nuti Reni e Autireria tei kore i rauka te tikaanga kia tae mai, i te mea oki e ko te Orometua ua e tona mata tei tae mai no te Ekalesia. Te irinaki katoa iatu nei e kua oronga katoa atu te Orometua e tona mata i te au akakitekiteanga kia kotou no te uipaanga mei tei tataia ki roto i te meneti uipaanga.

### Au ra o te uipaanga

Kua raveia te 27<sup>th</sup> Uipaanga Maata a te CICC mei te Sabati 22 – Sabati 29 Tiurai 2007 ki Rarotonga. Kua akatueria te uipaanga ki te Ekalesia Avarua i te pure avatea o te Sabati 22, e kua topiriii ki Avarua rai i te pure ai ai o te Sabati 29. Mei te 150 au taeake tei tae mai mei nga Ekalesia e 59 i te Kuki Airani nei, Nuti Reni e Autireria.

### Ngai noanga o te au Orometua e te Mata

Kua noo te maataanga o te au Orometua e to ratou au mata ki roto i nga Ekalesia e 6 i Rarotonga nei, mei tei matauia i te au uipaanga maata i topa. Mei te 18-20 au taeake tei noo atu ki roto i te Ekalesia okotai. Ko tei akarongorongo iatu, kua mataora ua te katoatoa i to ratou au ngai noanga, e pera te utuuuanga a nga Ekalesia i te au taeake kua manea tika'i te reira.

### Porokaramu uipaanga

Kua akamata te uipaanga ki te Ekalesia Nikao i te Monite 23 Tiurai e ki Arorangi i te Ruirua 24 Tiurai. Kua aiteite ua te akanoonoanga o te uipaanga i teia nga ra e 2. No te viviki i te tereanga o te uipaanga, kua akamutu atu te reira i te ora 5.00pm e kare i uipa po ana mei tei runga i te porokaramu. Kua pou te au ripoti katoatoa i te orongaia ki te katoatoa i te akaotianga te uipaanga ki Arorangi. Manea te au angaanga katoatoa a teia nga Ekalesia i te tua o te utuuuanga i te uipaanga tei tae atu kia raua.

Kare i uipa ana i te Ruitoru, kua aere te katoatoa ki te Naitonal Auditorium no te porokaramu taeanga Evangelia ki Rarotonga tei akanooia e te Konitara Ekalesia Rarotonga. Kua orongaia te au akatutuanga ki nga Ekalesia i Rarotonga nei, e kua riro na te Ekalesia Titikaveka i akanoo i te katikati i te oti anga te au angaanga i roto i te Auditorium. Manea te au angaanga katoatoa tei rave iatu i teia ra.

Kua tae te uipaanga i te Paraparau ki Ngatangia e kua uri iatu nga pepa mamaata tei tuku atu te kumiti akaaere ki te uipaanga no tona manako, koia oki te pepa akatupu Ekalesia ou, tauiaanga Orometua, akatakaanga i te angaanga a te au mou taoanga i roto i te Ekalesia, e pera te Orama o te CICC. Kua akamutu atu i te uipaanga i te 12.00pm no te patianganga a te Are Ariki ki te uipaanga kia tae atu ki tona akakoroanga i te 2.00pm.

I te ra openga o te uipaanga, Vaire, kua rave iatu te reira ki te Ekalesia Matavera. Kua akarongorongo atu te uipaanga i te au manako o te au taeake tei patii mei vao mai i te CICC, e kua uri katoa iatu te au tamanakoanga tei tukuia mai. Kua akamutu atu te uipaanga i te 12.00pm i te pou anga te au tumu manako i te uria.

### Tauiaanga Orometua

Kua arikiia te porokaramu tauiaanga Orometua no te 4 mataiti 2007-09 tei tukuia ki te uipaanga maata. Kua oronga katoaia ki te au Orometua te ka neke, kia pou ratou ki roto i ta ratou au Ekalesia ou i mua ake i te openga o teia mataiti 2007. E au tumuanga tetai i orongaia'i teia akakotingaanga tuatau, mei te apii a te anau a tetai au Orometua. Tena te akapapaanga o te au Orometua tiaki Ekalesia tei topiriii mai ki muri i teia nuti leta (**Annex I**).

### Akarakaraanga (evaluation) o te uipaanga

Kua tuaia te pepa (form) ki te katoatoa kia akakite mai i ta ratou i kite no runga i te akatereanga o te uipaanga. Kua rekareka te kumiti akaaere i te kite anga atu e kua meitaki ua te tereanga o te uipaanga i ta te au mata akairoanga ki runga i teia au pepa. Te vaira ra tetai au manako tei tukuia mai ta te kumiti ka akarakara no te akameitaki atu i te akatereanga o teia uipaanga ki mua.

**Meneti o te uipaanga**

Kua oti te meneti o te uipaanga i te tataia e kua tua iatu ki te au Orometua e te au mata i te Maanakai 28 Tiurai. Tei roto katoa i teia meneti te akaotianga i te au manako tei uriuria (**Resolutions**). Ko te vaerua ki konei koia oki kia ngoie ua i te au Orometua e te mata i te oronga akakite ki ta ratou au Ekalesia no runga i te au mea tei uria e tei akaotia i roto i te uipaanga. Te rekareka nei te kumiti akaaere e kua rauka teia i te rave iatu i roto i teia uipaanga. Tena te Resolutions o te uipaanga kua topiriia mai ki muri i teia nuti leta (**Annex II**) ei kiteanga na te katoatoa.

**Tutu o te uipaanga**

Kua tua katoaia te tutu o te aronga tei tae mai ki te uipaanga (**group photo**) ki te katoatoa te ka riro ei akamaaraanga na ratou i to ratou tomoanga mai ki teia uipaanga. Te vai nei rai teia tutu i Takamoā kare i pou, no reira tetai uatu kare i tu, me kore tei anoano i tetai tutu, akakite mai kiaku me kore ki te opati i Takamoā kia tuku iatu tetai naau.

**Au uipaanga takake na te kumiti akaaere**

Kua rave atu te kumiti akaaere i tetai au uipaanga takake (sideline meetings) ki te au Ekalesia e nga taeake tana i anoano kia uipa atu no tetai au tumuanga. E 24 au Ekalesia tei tae mai ki teia uriurianga manako. Kua rauka katoa tetai atianga kia komakoma atu te kumiti ki nga Konitara Ekalesia o Nuti Reni e Autireria. Kua rave iatu teia au uipaanga takake i te aiāi Ruitoru, aiāi Paraparau, aiāi Varaire, Maanakai popongi ki te aiāi, e pera te Monite 30 no Tiurai – ko te au atianga teia kare e uipaanga maata. E 30 meneti te roa i te Ekalesia okotai tei uipa ki te kumiti akaaere. Kua kitea te puapinga o teia au uipaanga, e i ta te kumiti akaraanga, e mea meitaki kia rave akaouia tetai au uipaanga mei teia te tu i roto i te uipaanga maata e tu mai nei 2009.

**Uipaanga Maata 2009 & 2011**

Kua ariki te uipaanga e kia oki akaou mai te uipaanga maata ki Rarotonga nei i te mataiti 2009. Kua ariki katoa te uipaanga i te patiangā a te Konitara Ekalesia o Aitutaki e kia riro aiā i te utuutu i te uipaanga maata o te mataiti 2011.

**3. OPATI OU I TAKAMOĀ**

Mei tei ripoti iatu i roto i te nuti leta numero 12, te anoano nei te kumiti akaaere i te akamata i te angaanga ki runga i to tatou opati ou i Takamoā. Kua uriuri manako atu te kumiti ki te aronga na ratou i toro mai i te parani no te opati, e a teia nga marama ki mua, ka tuku iatu te karere ki roto i te Cook Islands News no te akatuera atu i teia akakoroanga ki tetai uatu kamuta me kore kamupani tei anoano kia riro ia ratou teia apainga (tender). Me oti te kamuta i te ikiia, penei ka akamata te angaanga i te momua o teia mataiti ki mua 2008. E tano ei e ka oti teia akakoroanga i mua ake i te uipaanga maata 2009. Te taoki akaou iatu nei te patiangā ki te au Ekalesia katoatoa kia tuku mai i ta kotou tuanga me papa kotou, no teia akakoroanga maata kare e roa iatu na kua akamata.

**4. TERE O TE EKALESIĀ TETAUTUA KI NUTI RENI E AUTIRERIA**

“No lehova te enua e tona ki katoa, te ao nei e tei noo i reira.” I te mataiti 2006 i topa ake nei, kua akatupu te iti tangata Tetautua i Tongareva i tetai tere no te aere atu ki vao ake i te pae enua Kuki Airani no te kimi moni ei tauturu i te akameitakianga i te oire e te Evangelia. I roto i te marama Okotopa kua akaruke te tere no Nuti Reni, okotai epetoma ki Akarana, rere atu ei ki Sydney. E rua epetoma ki reira kua, oki akaou mai ki Nuti Reni na Porirua ki Akarana e tai epetoma ki reira.

E puapinga maata tei rauka ia ratou mei roto mai i te au Ekalesia tei ariki ia ratou e pera katoa mei roto mai i te au kopu tangata tatakita tei ariki ia ratou. Teia te puapinga tei rauka mai mei roto i te iti tangata Sydney e \$71,265. Mei roto i te iti tangata Nuti Reni, e \$121,360. Teia ireira te katoatoa anga e \$192,625. Kua oko te tere i tetai au apinga te ka riro ei tauturu i te iti tangata, to te oire e te Evangelia katoa i te oire ko Tetautua.

Teia te au apinga tei okoia: tractor, toroka, poti e te au masini poti, te au masini rikiriki mei te pamu vai, te generator e te chainsaw, te grass-cutter e tetai atu au apinga are mei te punu e te plywood, e te vai atura te maataanga o te au apinga kare i taiku iatu. Kua akaruke te tere ia Nuti Reni e kua oki atu ki te ipukarea ma te rekareka maata e te akameitaki i te Atua.

Te karanga nei te tuatua a te Atua “Ko ta lehova teia i rave te akara atu nei tatou mate umere.” No reira e to matou iti tangata, te oronga atu nei au i ta matou akameitakianga poria ia koutou. Kare e rauka ia matou kia tutaki atu i to kotou aroa. Teia ta te tuatua i karanga mai, na to kotou metua i te ao ra, e o mai e akakite ua mai i taau tutaki. Te karanga nei te tata Salamo, “E akameitaki ia lehova e taku vaerua e to roto katoa iaku nei i tona ingoa. E akameitaki ia lehova e taku vaerua, auraka tona katoa ra au takingameitaki kia akangaropoina.”

Mei roto atu i teia akameitakianga i te aronga mana o te enua. Mei te Island Council, pae rapakau maki (Health) te akava o te oire (Police) te tua o te uira (Power) pae angaanga (Public Works). Te tua o te Evangelia, mei te Orometua, uipaanga diakono te au arataki o te au putuputuanga tuketuke, te Ekalesia katoatoa e tae uatu ki te iti tangata katoatoa. Kare roa teia e ngaropoina ia matou. Ka riro teia au apinga tei okoia ei akamaharaharaanga na matou i to kotou ngakau aroa. Te karanga ra te reo tupuna, “Kia mau te serenga, kia mau te napenga, kia mau, kia mau, e te ra e, Hi.

Na te Atua e oronga mai i te manuia no kotou e kia akamaata ua mai i to kotou meitaki, e akakiki mai i ta kotou au ariki na roto i te au ra ki mua.

E iaia te Mana e te Kaka e te Tapunui, e tuatau ua atu, Amene.

*(Tataia e Rongo Taia, Tekeretere, Tetautua Ekalesia, Tongareva)*

## 5. KAINGA OROMETUA, OROMETUA OU NO Mt. SHERIDAN, CAIRNS

Kua akatapuia te kainga Orometua i roto nei i te Ekalesia CICC Mt Sheriden i Cairns nei, i te Maanakai 4 Aukute 2007 i te 10.00am. E maata te au mema tei tae mai ki teia angaanga. I muri ake i teia akatapuanga, e takuria tei taopenga atu i taua angaanga manea nei.

I te 11.00am Ruitoru 8 Aukute, kua tae mai te Orometua David Teaurere e tona tokorua e te nga tamariki, e kua turou ia atu raua e te Orometua Rev. Rakoroa Taia ki te Lady Penrhyn Hall e na te Secretary Mark Ford e te Mou Moni o te Ekalesia i arataki mai i te Orometua, e pera te Mata o te Ekalesia ki te Uipaanga Maata koia a Dane Rasmussen. Tei roto te Ekalesia katoatoa i te hall e tapapa maira. Kua oronga mai te Ekalesia i tana akangateitei i te Orometua ou na roto i tetai akairo manea tika'i koia oki kua tu te katoatoa ki runga i te taime e arataki atura te Orometua Rakoroa Taia iaia.

Kua raveia te pure araveianga tei riro e na te Orometua Rakoroa te reira i rave. Kua akaaraveiia atu te Orometua David e tona akaperepere e te nga tamariki, e te Secretary Mark Ford. Kia oti te kainga manga, ko te tuatau teia i pupu atu ei te Orometua Rakoroa Taia i te Ekalesia ki te Orometua ou. Kua oronga katoa atu te Orometua Rakoroa i tetai au tuatua akamaroiroi i te Orometua ou e no te angaanga tana ka rave ki roto i te Ekalesia Mt Sheriden. I na te Orometua Rakoroa atu ei, e ruru ua ta tatou e te pipi ki te vai, kareka ra te akatupu na te Atua ia. Kua iku mamate tika'i te Orometua Rakoroa ki te Ekalesia no runga i te tauturu i te tavini o te Atua no tona rave anga i te angaanga a te Atua i roto i te Ekalesia kia akara matatio tikai te Ekalesia i tona oraanga. I muri ake i teia ariki anga kua apai iatu te orometua David ki te ngutuare o te Ekalesia koia te kainga Orometua, tei akaingoa ia kia Beulah. Kua mataora te araveianga ki te Orometua ou. Kia oraana e kia manuia.

*(Tataia e Rev. Rakoroa Taia, Orometua o Mt. Sheridan i mua ana)*

## 6. UIPAANGA NA TE PACIFIC CONFERENCE OF CHURCHES

Kua rave iatu te uipaanga 5-mataiti a te Pacific Conference of Churches (PCC) no te 9 o te taime, i te epetoma 2 – 8 Tepetema 2007 ki Pago Pago, American Samoa. Kua mata iatu te CICC e te Tekeretere Maata (Nga Mataio), Mou Moni Maata (Oku Teokoitu), Vaine Maui (metua vaine), e Teroro Tapurau-Totini (mapu). Ko teia rai oki te numero tei tukua mai no te CICC kia tau ki tona turanga i roto i te akapapaanga a te PCC no te au akonoanga (medium church). Te vai katoa ra oki to runga atu (large churches – 6 mata) e to raro mai (small churches – 2 mata).

Ko te manako maata (theme) o teia uipaanga koia oki, "Atua, empower us to be liberating communities." I roto i to tatou reo, "E te Atua, oronga mai i te mana e te maroiroi kia rauka ia matou i te tauturu i to matou iti tangata e noo nei ki roto i te oraanga tai'i e te ngata." Kua angaia teia manako maata kia tau ki te au tai'i e te manamanata e kitea nei i roto i te Pacific i teia ra, tena

te kitera tatou i runga i te TV, i roto i te nuti pepa e na roto i te ratio. Noatu oki e tei nga enua mamaata (meia Papua New Guinea, Solomon Islands, Fiji) te maataanga o teia au manamanata, te vai katoa ra te au tai'i e tupu nei i runga i te au enua katoatoa, mei te manamanata o te reva (climate change), pekapeka tane, vaine e te tamariki, manamanata o te moni, ta tangata, keikeia, e te vai atura. Kua ariki te uipaanga e kua tau mari teia ei manako maata no teia uipaanga, e kia akamaroiroi te au akonoanga tuketuke i raro ake i te tamaruanga a te PCC, i te timata atu i ta ratou ka rauka no te akaiti atu i teia au manamanata e te tai'i i roto i te oraanga nei.

Ko te taime mua rai teia i tae ei teia au tangata i runga nei ki te uipaanga 5-mataiti a te PCC. Ka maara i tetai pae e i te mataiti 2002 kua raveia teia uipaanga ki Rarotonga nei ki ko i te National Auditorium, e kua tae mai mei tetai 200 au mata mei te au akonoanga tukeke i roto nei i te Pacific. Ko te uipaanga numero 8 te reira a te PCC. I na, ko te numero 9 teia tei rave iatu ki Pago Pago. I roto i te Kuki Airani, ko te CICC e te Katorika ua te nga akonoanga e mata raua i roto i teia taokotaianga PCC, e ko raua rai te piri atu ana ki roto i te au uipaanga 5-mataiti e pera tetai atu au porokaramu ta te PCC e akanoo ana. Kua anauia teia taokotaianga PCC i te mataiti 1961 ki Samoa, e kua riro te Orometua Ta Upu Pere i te mata atu i te CICC ki roto i te reira uipaanga. I te au mataiti i muri mai, kua mata ua iana rai te CICC ki teia uipaanga e tae ua mai ki teia ra. Ka raveia te uipaanga ki mua i te mataiti 2012 ki te Solomon Islands.

E maata te au tauturu ta te PCC e oronga maina ki te CICC, mei te tutakianga i to tatou au mata ki te au iriiri kapua i roto i te Pacific (ko te maataanga ki Fiji), te au apinga angaanga opati i Takamoa, e te vai atura.

I roto i te uipaanga tei rave iatu ki Pago Pago, ko teia i raro nei te au tumu manako tei uri iatu:

- Ripoti a te aronga mou taoanga
- Akara akaouanga (review) i te ture tumu (PCC Constitution)
- Ripoti (presentations) e 5 no runga i te turanga o te Evangelia i roto i te Pacific e tana au apainga no te iti tangata Pacific
- Ripoti na nga pupu e 6 tei tua iatu te au mata ki roto e ta ratou atu tumu tapura tei uri atu no runga i te au mea e tupu nei ki roto i te Pacific e arapaki atu nei ki te oraanga ngutuare e te oraanga kerestiano
- Akaouanga i te aronga mou taoanga no nga mataiti e 5 ki mua 2007–12

I roto i te aronga mou taoanga tei ikiia mai no nga mataiti e 5 e tu mai nei, kua o atu te Tekeretere Maata, Nga Mataio, ki runga i te kumiti akaaere (Executive Committee) o te PCC. E 20 oki au mema i runga i teia kumiti i te katoatoa, e ka uipa ratou mei te 2 taime i te mataiti.

Kua riro teia uipaanga ei kite marama (eye opener) atu anga na matou tei tae atu, i te au mea e tupu nei e te paraniia nei no te Evangelia a Iesu Mesia i roto i to tatou pa moana Pacific, e te au mea e riro nei i te kaitamaki mai ki te tupu ruperupeanga o tona basileia i te ao nei. Te oronga nei i te akameitakianga ki te kumiti akaaere o te CICC ko ratou tei iki mai ia matou kia tae no tatou, meitaki maata.

**7. TIAKI MEITAKIANGA I TE MONI A TE EKALEZIA**

I roto i te uipaanga mua a te kumiti akaaere i muri ake i te uipaanga maata i oti uake nei, kua uri e kua akarakara te kumiti i teia tumu manako puapinga tika i te mea e te tai'i nei tetai au Ekalesia i roto i teia ngai. Te kitea katoaia mai nei e te riro nei teia manamanata ei tumuanga na tetai pae o to tatou au mema i te akaruke mai i ta tatou akonoanga CICC no te tomo atu ki roto i tetai au akonoanga ke, me kore noo ua ki te kainga. Ko tetai pae, kare e akaputu moni akaouanga i te turanga ta ratou i matau i mua na no teia e raveia nei. Te tuatua nei oki ratou e, me kare e meitaki ana te tiakianga i te moni a te Ekalesia, me te riro nei tetai tangata me kore tetai nga tangata i te keia/kai i ta matou moni, e kare e papa'anga no teia e tupu nei, eaa te puapinga iaku i konei?

No teia manamanata e kitea atu nei e te maata ua atura, kua manako te kumiti kia rauka tetai akamatutuanga no runga i te turanga tiaki i te moni a te Ekalesia. Teia ireira ta te kumiti i akaoti:

- (i) Kia parani mai te Mou Moni Maata i tetai au iriiri kapua (workshops) na te au mou moni o te Ekalesia e kia akamata i te taangaanga i teia parani me papa aia. Penei ka patia rai te au tekeretere o te Ekalesia kia piri mai i te mea e ko raua ko te mou moni tetai nga tangata puapinga rava atu i roto i te tuanga akateretereanga (administration) o te Ekalesia.
- (ii) Kia akamaaraara putuputuia ki te au Ekalesia i te au takainga tei tau e meitaki ei te tiakianga i te moni a te Ekalesia.

Kia tau ireira ki te numero (ii) i runga nei, teia te au mea tei anoano au Mou Moni Maata kia oronga akakite iatu i teia taime. Ko teia au mea oki, kua oronga iatu i roto i te uipaanga maata, me kore kua kite takere tetai pae.

- Mou moni kia kite meitaki aia e, eaa tana angaanga. Tena te akamaramaanga no tana angaanga tei roto i te pepa tei akaupokoia, **“terms of reference of church posts: akatakaanga i te angaanga a te au mou taoanga i roto i te Ekalesia”** tei tukuia e tei arikiia i roto i te uipaanga maata.
- Kia riro e toru au ingoa akapapu (trustees) no te account, e rua kia taina e rauka i te moni i te taangaanga, auraka oki e tai ua. E mea puapinga katoa kare e pirianga vaitata i rotopu ia ratou, mei te tane/vaine, papa/tamaiti/ tuakana/teina.
- Kia otitaia (audit) te moni i te au mataiti ravarai. Ka rauka oki i te otita i te akakite mai i te au ngai apikepika tei anoanoia kia akameitakiia, i mua ake ka maata atu ei te manamanata.
- I te tuatau ripotianga moni ki te Ekalesia, e mea puapinga kia topiriia mai tetai akakiteanga (updated bank statement) mei te bank mai ei akapapu e ko te au numero e ripoti iara, kua aiteite te reira ki ta te bank akapapaanga. I tetai taime oki, ka ripotiia ki te Ekalesia te turanga o te moni e vai ra, e oti akera kare ua e moni i roto i te bank me kore kare i tau ki te vai ra i roto i te bank. Kare oki te Ekalesia e kite no te mea kare e pepa

akapapuanga mei te bank mai ei turu i ta te mou moni e ripoti ra.

- Kia receipt ia te au moni katoatoa e orongaia maina ki te Ekalesia, e kia akairoia te au akakoroanga no te moni.
- Kia tutaki me kare oronga vaveia te au moni no te akakoroanga i akatakaia te oronga anga mai o te reira moni ma te rekoti katoa (cheque payments) me kare (cash payments) kia rekotiia ma te akapapaia ki roto i te au ripotianga.
- Kia tata te au Ekalesia i tetai ripoti moni mataiti na ratou, e kitea i te turanga meitaki e te apikepika o te Ekalesia i te turanga o te moni.

Kua irinaki au e pera te kumiti akaaere e, me rauka i te au Ekalesia katoatoa i te aru i teia au takainga i runga nei, ka kore takiri te manamanata e kitea nei no runga i te makokore o te tiakianga i te moni a te Ekalesia. Kua akakite mai oki te Bibilia e, auraka rava koe e keia. No reira ka akamaroiro i tatou i teia tuanga puapinga i roto i te akateretereanga meitaki o te Ekalesia, ko te ka riro ei maruanga ki te au mema e ki mua katoa i te mana katoatoa.

*(Tataia e Oki Teokoitu, Mou Moni Maata)*

**8. TERE O TE TEKERETERE MAATA KI NUTI RENI**

I te toru o te epetoma o Tepetema nei, kua rauka tetai araveianga no te Tekeretere Maata i te Konitara Ekalesia o Wellington, e pera nga Ekalesia Mangere e Motutapu i Auckland, iaia i tere atu ki Wellington no tetai akakoroanga uipaanga no tana ngai angaanga.

**Konitara Ekalesia Wellington**

I te aiai Varaire 21 Tepetema, kua raveia te uipaanga kapiti a te Wellington CICC Council ki te Teketerere Maata na roto i tana patiaanga e kia rauka tetai atianga uriuri manako ki te konitara. I roto i te reira uriurianga manako, ko teia te au mea mamaata e te puapinga tei tuatuaia:

- Akamarama akaouanga na te Tekeretere Maata no runga i te nga pepa puapinga tei arikiia e te uipaanga maata e tei anoanoia te katoatoa kia timata i te aru, koia oki te policy no runga i te akatupu Ekalesia, policy no runga i te tauiaanga Orometua, e pera te akatakaanga i te angaanga a te au mou taoanga i roto i te Ekalesia.
- Meneti o te uipaanga maata i topa, e tetai atu au mea tei arikiia i roto i te uipaanga, takake mei te nga pepa i taikuia i runga nei.
- Te au tai'i e kitea nei i roto i nga Ekalesia no runga i te tuatua o te moni e pera te tu akateretereanga.
- Tetai tere iriiri kapua tei pati mai te konitara kia tae atu ki Wellington

I muri ake i te uipaanga, kua raveia tetai arikirikianga na te Ekalesia, kua kai e kua mataora te katoatoa. Te oronga atu nei i te reo akaaravei ki te katoatoa no roto mai i nga Ekalesia e 4 i roto i te oire Wellington.

**Ekalesia Mangere**

I te Sabati 23 Tepetema, 11.00am kua atoro atu te Tekeretere i te Ekalesia Mangere e kua orongaia mai te pure kia rave aia, kia akameitakiia te Atua. Kua aru katoa atu te metua Elder, Honu Ben, i te Tekeretere ki Mangere. Ko te Orometua Tatahirangi Williams mei Rotorua mai te tiaki nei i te Ekalesia i teia tuatau. Mei tetai 50 te katoatoa o te au mema e pera te tamariki tei tae mai ki te pure; kare ra e ko te katoaanga teia o te mema i roto i teia Ekalesia, i na te Orometua mai ei. Kua raveia ta ratou uipaanga koata i muri ake i te pure, kare ra te Tekeretere i noo atu ana no te pure ki te Ekalesia Motutapu i te ora 1.00pm. Te oronga mai nei te Ekalesia i tona reo aroa ki te katoatoa na roto i teia nuti leta.

**Ekalesia Motutapu**

Mei te Ekalesia Mangere kua tae atu te Tekeretere raua ko Honu Ben ki te Ekalesia Motutapu e kua araveia mai e te Orometua Tutu Williams e pera tona tauturu, te Orometua Bosini Tekena. Na te Orometua Bosini i rave i te pure e kia oti, kua oronga atu te Tekeretere i te reo akaaravei o te kumiti akaaere, e pera tetai au manako akamaroiroiroi no te tuatau ki mua. Kia oti te pure kua rave te Ekalesia i tetai akonoanga arikirikianga, kia akameitakiia te Atua. Mei te Ekalesia Mangere, te oronga katoa mai nei te Ekalesia Motutapu i tona reo aroa ki te katoatoa na roto i teia nuti leta.

**9. BUKA E OKOIA NEI I TAKAMOA**

Te rekareka nei te opati i Takamoa i te akakite atu ki te katoatoa e kua tae akaou mai ta tatou Buka Imene maori kava paruparu (soft cover); kua pou ana oki teia buka i Takamoa nei no tetai tuatau. Teia ireira te turanga o te au buka e okoia nei i Takamoa i teia ra:

Buka Imene soft cover	\$15
Buka Tapu soft cover	\$45
Buka Tapu hard cover	\$20
Buka Pure	\$12

Ko te Buka Imene hard cover kare e order akaouia ana no te mea kare e order e tae maina. Pera te Buka Tapu papaa kare e order akaouia no te mea ka ngoie ua teia i te oko i roto i tetai uatu Christian Bookshop.

Teia au moni i runga nei, kare te freight i roto. No reira kotou i te outer islands, Nuti Reni e Autireria, ringi mai i te opati, ei reira e akakite iatu ei te turanga o te moni na runga ake no te freight. Tena te au taeake e aere maina ki Rarotonga nei, penei me riro e na ratou e apai atu i ta kotou order, kare ireira kotou e tutaki freight.

**10. NGAI NOOANGA**

Te taoki akaou iatu nei teia karere kia kotou e te au Orometua, Tekeretere e te Mou Moni o te au Ekalesia tatakitai: tuku mai i to kotou ngai nooanga (contact addresses) kia ngoie ua te karere i te tuku atu kia kotou. Me kua tuku mai kotou i teia i nga ra i topa, meitaki maata. Teia te akamaramaanga i raro nei:

Orometua – kotou tei tau iatu ki ta kotou Ekalesia ou i Nuti Reni e Autireria, e mea puapinga kia tuku viviki mai i te address, me e tienianga tetai mei te address o toou taeake i mua ake iakoe.

Tekeretere – tuku mai i te address me kua tieni mei te address tei tuku takereia mai.

Mou Moni - tuku mai i te address me kua tieni mei te address tei tuku takereia mai.

Te kitea mai nei e, e tieni putuputu ana te Tekeretere e pera te Mou Moni o tetai au Ekalesia, no reira kia tika akakite viviki mai ki Takamoa. Me ariki mai kotou i teia patianganga, kare rava ireira a kotou akaapaanga e, kare kotou e akara me kore contact iatu ana no te au karere puapinga e tuku iatu ana ki te Ekalesia. Ko teia i raro nei te anoano iatu nei:

- Ingoa e te ngai nooanga (contact address) o te Orometua, Tekeretere e te Mou Moni
- Numero phone (phone number) o te Orometua, Tekeretere e te Mou Moni
- Emere address (email address) o te Orometua, Tekeretere e te Mou Moni me e mea tetai
- Numero fax o te Orometua, Tekeretere e te Mou Moni me e mea tetai

**11. AKAPAPAANGA TUATUA**

I roto i teia nuti leta, ka tatau tatou i te akapapaanga tuatua o Papa Maeva Karati, tavini maroiroiroi no te Atua i roto i te Ekalesia Avarua, tamaiti na Akatokamanava. Tena tona tua tapapa kua topiriia mai ki muri i teia nuti leta (**Annex III**). Ko te 6 teia o te akapapaanga tuatua te ka tukuia ki roto i teia nuti leta. Te tuera nei rai te ngutupa no tetai uatu tei anoano i te taangaanga i teia nuti leta no teia akakoroanga. Tuku tika mai i te tuatua kiaku e tetai tutu.

**12. POPANI**

Tena ireira e te au taeake ma te au tuaine te au mea tei anoano ta kotou kumiti akaaere kia oronga akakite atu ei kiteanga na kotou i te au mea e tupu nei, e te paraniia nei no teia au tuatau ki mua i roto i ta tatou nei akonoanga CICC. Irinaki matou i runga i te kumiti akaaere e ka riro teia au akakitekiteanga ei pumaana ki roto i to kotou au ngakau tatakitai. Me e au manako to kotou i te akameitaki atu i te turanga o teia nuti leta, ka rekareka au kia tuku tika mai kotou i te reira kiaku.

Ei topiri i teia nuti leta, te na ko nei te Roma 11.36:

*Nona mai oki, e nana, e nona te au mea katoatoa nei: ei iaia te kaka mutukore, Amene. For all things were created by him, and all things exist through him and for him. To God be the glory for ever, Amen.*

Ei konei tatou i te tuatua akakiteanga i tona aroa opekore uatu rai, Amene.

## ANNEX I

### TAUIANGA OROMETUA, 2007-2011

#### COOK ISLANDS

##### Rarotonga

AVARUA	Rev. Tuaine Ngametua
ARORANGI	Rev. Lelei Patia
NGATANGIIA	Rev. Tutai Nooana
TITIKAVEKA	Rev. Ngatokorua Patia
NIKAO	Rev. Tereora Tereora
MATAVERA	Rev. Ina Moetaua

##### Mangaia

ONEROA	<i>Minister from Tahiti (2008)</i>
IVIRUA	Rev. Toko Ongoua
TAMARUA	Rev. Tangaputa Tinirau

##### Aitutaki

ARUTANGA	Rev. Tuvaine Glassie
TAUTU	Rev. Charlie Teopenga
VAIPAE	Rev. Charlie Okotai

##### Atiu

Rev. Oirua Rasmussen
----------------------

##### Mauke

OIRETUMU	Rev. Ngara Aratangi
KIMIANGATAU	Rev. Yakilia Vailoa

##### Mitiaro

Rev. Panu Rouru
-----------------

##### Pukapuka

Rev. Maitua Atirai
--------------------

##### Manihiki

TUKAO	Rev. Mokoha Kora
TAUHUNU	Rev. Pumati Pumati

##### Rakahanga

Rev. Terepai Kauvarevai
-------------------------

##### Penrhyn

OMOKA	Rev. Mauri Paulo
TETAUTUA	Rev. Vaipeka Tonitara

##### Palmerston

Rev. Tereapii Matakere
------------------------

#### NEW ZEALAND

AUCKLAND CITY	Rev. Nio Mare
SOUTH AUCKLAND	Rev. Papa Aratangi
MANGERE	Rev. Tatahirangi Williams
OTARA	Rev. Temere Poaru
OTAHUHU	Rev. Jubilee Turama
OTARA CENTRAL	Rev. Rohi Tinirau
MAUNGAREI	Rev. Peri Daniel
EAST TAMAKI	Rev. Joel Taime
NORTH SHORE	Rev. Frank Williams
MANUREWA	Rev. Ta Tangiiti
MOTUTAPU	Rev. Tutu Williams
HAMILTON	Rev. Maara Tairea
ROTORUA	Rev. Teao Teao
HASTINGS	Rev. Abela Williams
PALMERSTON NORTH	Rev. Kamire Meti
PORIRUA EKKA	Rev. Ngatupuna Nioputa
PORIRUA CICC	Rev. Tereapii Teurima
HUTT VALLEY CENTRAL	Rev. Tutavake Tereni
CHRISTCHURCH	Rev. James Marsters

INVERCARGILL
MID CANTERBURY
MAYFAIR
MIRAMAR

Rev. Teremoana Utia
Rev. Ranginui Vini
Rev. Anesi Taom
Rev. Teaumetua Pouau

#### AUSTRALIA

##### Queensland

BALACLAVA
Mt. SHERIDAN
BRISBANE
LOGAN
TOWNSVILLE

Rev. Rakoroa Taia
Rev. David Teaurere
Rev. Temaire Vaeau
Rev. Tokoa Arokapiti
Rev. Uru Tairea

##### New South Wales

SYDNEY
LIVERPOOL
DULWICH HILL

Rev. Takaikura S. Marsters
Rev. Tinirau Soatini
Rev. Joe Atirai

##### Victoria

CLAYTON
RESERVOIR
DANDENONG
SPRINGVALE
HAMPTON PARK

Rev. Mata Makara
Rev. Teina Tepania
Rev. Mahuta Tautu
Rev. Marii Tautu
Rev. Tuakeu Daniel

##### TAHITI

Rev. Haua Manuela
-------------------

##### Ministers Going for Church Planting

Rev. Iana Aitau	Sydney, Australia
Rev. Vero Akama	Napier, New Zealand
Rev. Teiho Maireriki	Brisbane, Australia

##### Retiring Ministers

Rev. Ta Samuela William
Rev. Daniel Tuakeu
Rev. Enea Totini

##### Total Ekalesia:

Cook Islands	23
New Zealand	23
Australia	13
	----
	<b>59</b>

*Note: there is no CICC Ekalesia in Tahiti. The CICC and its Tahiti partner church (Eglise Evangelique de Polynesie Francaise), both originated from the London Missionary Society (LMS) and have a Ministers exchange programme in place for many years now.*

## ANNEX II

### RESOLUTIONS, GENERAL ASSEMBLY 2007

#### MONITE 23

1. Te au Ekalesia ou kare i akatainuia ake, kia raveia teia me tae ki te tuatau tei tau.
2. No te au apinga akatangi i roto i te Ekalesia i te tuatau akamorianga, kua akaokii ki te au Ekalesia na ratou rai e iki i ta ratou ka inangaro.
3. Moni project (administration office) ki te pute maata, kia akamaroiroi mai te au Ekalesia kare i tuku mai ake i ta ratou.
4. Tuatau uipaanga: kare e tauia, ka noo rai ki te 2 mataiti.
5. Kua arikiia te au tamanakoanga i roto i te ripoti a te **Orometua Ngateitei**, koia oki:
  - (a) Kia apiiia te tuatua na te Atua.
  - (b) Kia angaanga taokotai tatou i roto i te Ekalesia.
  - (c) Kia tutuia te Evangelia.
  - (d) Kia rave tatou i te angaanga aroa e te takinga meitaki.
  - (e) Kia tata mai te au Orometua i tetai ripoti mataiti no runga i ta ratou angaanga i roto i te Ekalesia.
6. Kua arikiia te au tamanakoanga i roto i te ripoti a te **Tekeretere Maata**, koia oki:
  - (a) Kia akamaroiroiia te au Ekalesia kare a ratou emere, kia tamou i tetai na ratou.
  - (b) Kia viviki te akakite mai ki Takamoa, me tieni te au ngai nooanga (contact addresses, phone, fax, email) o te au Orometua, Tekeretere e te Mou Moni o te Ekalesia.
  - (c) Kia taanganga te au Ekalesia i te CICC nuti leta ei ravenga kia kitea pu ua ia te au mea e tupu ra i roto i ta tatou akonoanga.
7. Kua arikiia te au tamanakoanga i roto i te ripoti a te **Mou Moni**, koia oki:
  - (a) Kia receipt ia te au moni katoatoa e orongaia maina ki te Ekalesia, e kia akairoia te au akakoroanga no te moni.
  - (b) Kia tutaki me kare oronga vaveia te au moni no te akakoroanga i akatakaia te oronga anga mai o te reira moni ma te rekoti katoa (cheque payments) me kare (cash payments) kia rekotiiia ma te akapapaia ki roto i te au ripotianga moni epetoma, toru marama e te ripoti mataiti.
  - (c) Kia iki te Ekalesia i tetai Otita (Auditor) no ta ratou ripoti moni mataiti kia matutu te turanga o te au ripoti.
  - (d) Kia tata te au Ekalesia i tetai ripoti moni mataiti na ratou, e kitea'i te turanga meitaki e te apikepikē o te Ekalesia i te turanga o te moni.

Takake mei tei arikiia i runga nei, kua ariki katoaia teia au manako i raro nei i roto rai i te tuanga a te Mou Moni:

- (e) Kia tutaki te pute maata i te super a te au Orometua e aere nei ki Tahiti.
  - (f) Kia tutakiiia te au Orometua i ta ratou stipend me oki mai ratou mei Tahiti e kare a ratou Ekalesia i papa ake no te tomo ki roto.
  - (g) Te akapapaanga moni (budget) tei tukuia ki te katoatoa no nga mataiti 2008/09.
  - (h) Kia noo rai mei tei matauia, te akanoonoanga no runga i te maata o te apinga o te Orometua tana ka apai i te tuatau tauia te ka riro e na te pute maata e tutaki.
  - (i) Kia o mai te Orometua Mahuta Tapaitau (Orometua makimaki kua akangaroi) ki roto i te akanoonoanga no te superannuation scheme.
8. Kua arikiia te au tamanakoanga i roto i te ripoti a te **Puapii Maata**, koia oki:
    - (a) Kia tereniia rai te au apiianga i mua ake ka tomo ei ia Takamoa.
    - (b) Kia rua ua tamariki a te au apiianga te ka apai mai ki Takamoa, auraka kia maata atu no te mea ka riro ei apainga kia ratou uarai ia ratou e apii ra.
  9. Kua arikiia te ripoti akamarama a te **Kumiti o Tepuka** e tana au parani no te akatupuanga i te au manakonakoanga no teia enua ei puapinga ki te CICC (kare ana tamanakoanga kia ariki te uipaanga maata).

#### RUIRUA 24

10. Kua arikiia te au tamanakoanga i roto i te ripoti a te **Director of Social Welfare**, koia oki:
  - (a) Kia vai ua rai te tuanga moni mei roto mai i te pute maata ei tauturu i te tuanga angaanga a te au Program Directors no teia 2 mataiti ki mua.
  - (b) Kia akamataia tetai putupuanga na te CICC tika'i no te tauturu i te au turanga manamanata i roto i te oraanga ngutuare, e kia patiiia atu te tauturu a te PCC e te WCC no te apainga i teia porokaramu ki te au ngai katoatoa.
  - (c) Kia riro te Recording Studio i Takamoa ei tauturu i te rekoti i te au ripene imene a te au Ekalesia.
11. Kua arikiia te au tamanakoanga i roto i te ripoti a te **Director of Evangelism**, koia oki:



- (a) Kia akamaroiroia te tuanga pure ki roto i te au Ekalesia CICC katoatoa.
- (b) Kia rave ua iatu rai te porokaramu tutu Evangelia no te meitaki o te anau mapu.
- (c) Ko te porokaramu atoro ngutuare kia akamaroiroia.
- (d) Kia akamaata iatu te rave apii e te terenianga ki roto i te au Ekalesia.
12. Kua arikiia te au tamanakoanga i roto i te ripoti a te **Director of Youth**, koia oki:
- (a) Kia raveia tetai au terenianga/iriiri kapua na te au konitara ki te pa enua i tai.
- (b) Kia akatupuia rai te putuputuanga taokotaianga Mapu Keresitiano (Christian Youth National Council).
- (c) Kia raveia rai te National Youth Convention a te Mapu.
- (d) Kia akatanoia te au porokaramu karena kia kore e tai'i.
- (e) Tuanga moni tauturu i te Tipatimani o te Mapu (budget) kia vai rai.
- (f) Kia atoro iatu rai te au putuputuanga mapu i te Kuki Airani nei, Nuti Reni e Autireria.
- Kua ariki katoaia te vaerua o te au tamanakoanga akameitaki atu i te au angaanga a teia tipatimani.
13. Kua arikiia te au tamanakoanga i roto i te ripoti a te **Acting Director of Publications**, koia oki:
- (a) Kia akameitakiia mai te pia rekoti (recording room) i Takamoa.
- (b) Kia akameitakiia mai te pia neneianga (printing room) i Takamoa.
- Kua akatinamou katoaia te taoanga Director of Publications ki runga ia Tekura (Steak) Potoru.
14. Kua oronga atu te uipaanga i tana akameitakianga e te akamaroiroi no te au manakonakoanga o te **Vainetini** no te tuatau ki mua (kare a ratou tamanakoanga kia ariki te uipaanga).
15. Kua arikiia te au tamanakoanga i roto i te ripoti a te **Rarotonga Konitara Ekalesia**, koia oki:
- (a) Kia aere uatu rai te maroiroi i te akatupu i tana Evangelia, e kia akamaroiroia te au ngai paruparu.
- (b) Kia akamatutu iatu rai te apii i roto i te Ekalesia me kore te au putuputuanga tatakita i roto i te Ekalesia.
- (c) Kia maroiroi te au tangata mou taoanga i roto i te Ekalesia tatakita i te tiki/akaariu mai te au mema/tangata ki te akonoanga CICC.
16. Kua oronga atu te uipaanga i tana reo akameitakianga ki te mata o te **Pa Enua Tokerau** no tana ripoti (kare ana tamanakoanga kia ariki te uipaanga).
17. Kua arikiia te au tamanakoanga i roto i te ripoti a te **Pa Enua Tonga**, koia oki:
- (a) Kia akamaroiroi te au Ekalesia i te tamou i tetai email na ratou kia viviki te kaveanga tuatua.
- (b) Kia akatanoia te au tuanga rave pure a te au Orometua kia aiteite.
- (c) Kia tareia te tangata (census) i roto i te au Ekalesia kia papu meitaki to ratou turanga mema.
- (d) Kia kimi mai te Kumiti Orometua e te Kumiti Akaaere i te au ravenga no te akaiti mai i te manamanata o te kanga tamariki tamaine e tetai atu au tu manamanata e o nei te au Orometua e te au arataki Evangelia ki roto.
18. Kua arikiia te au tamanakoanga i roto i te ripoti a te **Konitara Ekalesia o Nuti Reni**, koia oki:
- (a) Kia akataka meitakiia te kotinga angaanga no tetai uatu Orometua te ka akatupu Ekalesia.
- (b) Kia kauraroia te tukuanga tika a te Konitara Ekalesia o Nuti Reni no runga i tetai uatu tere kimi moni ki reira.
- (c) Kia akara akaouia te CICC Constitution e te mataara kia tukati ki te au papa ture retitaanga a te au Ekalesia o Nuti Reni.
- Kua ariki katoa te uipaanga e kia roto te Roia Akamarama o te CICC, laveta Short, e nga Konitara Ekalesia o Nuti Reni e Autireria i te akara akaou (review) ki roto i te tuatua o te ture tumu (constitution) no te akamatutu i te turanga o nga konitara e pera te kopapa metua i te Kuki Airani nei.
19. Kua arikiia te tamanakoanga okotai i roto i te ripoti a te **Konitara Ekalesia o Autireria**, koia oki:
- Kia akakiteia mai ki te Konitara te tuatua no te tauiaanga Orometua me kore tuku Orometua ou ki roto i tetai uatu Ekalesia i Autireria mei vao mai ia Autireria.
20. Kua arikiia te ripoti a te **Kumiti Orometua** no runga i te akapapaanga tauiaanga Orometua 2007 (refer **Annex III**). Topiri atu ki teia, kia tauruia mai te Orometua Bosini Williams ki roto i te tauiaanga Orometua.
21. Kua ariki te uipaanga i te ripoti takake a te Orometua Tuaine Ngametua o **Arorangi** (kare teia i roto i te porokaramu uipaanga e kare katoa oki e tamanakoanga kia ariki te uipaanga).

## **RUIORU 25**

Kare e uipaanga i raveia no te akakoroanga o te ra taeanga Evangelia ki Rarotonga tei akamaaraia ki te National Auditorium. Kua tae te uipaanga maata, nga Ekalesia e 6, te au taeake tei patia, e pera te au tangata no vao mai tei tae no te matakita i te akakoroanga manea tei porokaramuia e te Konitara Ekalesia Rarotonga.

## **PARAPARAU 26**

22. Kua arikiia te pepa ture akateretere (**policy**) a te kumiti akaaere no runga i te **akatupu Ekalesia**.
23. Kua arikiia te pepa ture akateretere (**policy**) a te kumiti akaaere no runga i te **tauiaanga Orometua**.

24. Kua arikiia te au tamanakoanga i raro nei no runga i te pepa "**akatakaanga i te angaanga a te au mou taoanga i roto i te Ekalesia**" tei akapapaia e te kumiti akaaere:

- (a) Kia riro teia pepa ei akaraanga/kaveinga no te akakiteanga/akatinamouanga i te au tuanga angaanga a te au taoanga tukeke i roto i te Ekalesia.
- (b) Me kua anoanoia, kia akatanotano te Ekalesia i teia kaveinga kia tau ki te turanga i roto i te Ekalesia, auraka ra kia ngaro te vaerua puapinga i roto i te akatakatakaanga o te au taoanga.
- (c) Kia uriia teia tataanga ki roto i te reo Maori e kia tuaia ki te au Ekalesia katoatoa i rotopu i te 6 marama e tu mai nei.

Kua ariki te kumiti akaaere i nga manako i raro nei tei patiiia mai kia tauru iatu ki roto i te ripoti:

- Kia akataka katoaia te angaanga a te Mama Orometua e tona turanga i roto i te Ekalesia kia kore e tai'i ki te au akanoonoanga i roto i te au Ekalesia ta raua ko tona tokorua Orometua ka tomo.
- Kia tauru iatu te putuputuanga Girl Guides ki roto i te kapi 3.

25. Kua arikiia te **Oroma** o te CICC e ko teia i raro nei:

*"To worship and serve God, and to make Jesus known to all people. Ko te akamori e te tavini i te Atua na roto i te akakiteanga ia Iesu Mesia ki te au tangata ravarai."*

Ka vaooia teia ki te kumiti akaaere kia akara e me kua tau tetai au manako tei orongaia mai e te uipaanga kia tauru iatu ki roto ei akameitaki atu i te tangianganga o teia orama.

### **VARAIRE 27**

26. Kua arikiia teia au tamanakoanga i raro nei:

- (a) Te apiianga Poutapu Soatini kia akatupu Ekalesia ou i raro ake rai i te akatereanga tutu Evangelia, kare i te Orometua CICC.
- (b) Ka apai te Orometua e 2 utaro na te pute maata e tutaki me kare ana tamariki nana uaorai. Me e tamariki ra tana, ka aru rai ireira i te akatereanga e 2 tamariki to raua mataiti tei raro ake i te 18.
- (c) Kia akamatutua te reo Maori i roto i ta tatou akonoanga CICC, e kia ikiia mai tetai kumiti nana e parani mai i te au angaanga tei tau kia raveia i te akatupuanga i teia inangaro.
- (d) Ka oki mai te uipaanga maata 2009 ki Rarotonga nei.
- (e) Ka aere te uipaanga maata 2011 ki Aitutaki i te marama Okotopa.

Ko te toeanga o te au tamanakoanga, kare i arikiia me kore kua tukuia kia ratou e na ratou te reira au tuanga (mei te tuatua o te moni ka tuku ki te CICC Finance Committee), me kore kua oti takere tona tuatua i roto rai i teia uipaanga.

# ANNEX III

## PROFILE OF PAPA MÆVA KARATI



Temaeva Arii Tepouae Raemaki Karati,  
e tona akaperepere, Teata Kurakura o te Ra

**AKAPAPAANGA TUATUA NO PAPA MAEVA KARATI**

*Tataia e Tekura (Steak) Potoru, CICC Director of Publications*

AKATOMOANGA

KIA ORANA TATOU I TE AROA MAATA O TE ATUA. TEIA TE IRAVA NO TATOU, LUKA 12 : 43  
 "E AO TO TE REIRA TAVINI, TO TEI ROKOIA MAI E TONA PU, TE PERA RA"

TEMAEVA ARII TEPOUE'A RAEMAKI KARATI

KUA ANAUIA KI AKATOKAMANAVA I TE RĀ 12TH O TITEMA MATAITI 1932. KO PAPA MAEVA TE RUA O TE ANAU I TE TOKO VARU TAMARIKI A KOPUKO'AO RAEMAKI KARATI E TARARO ANAPA ARII NATUA-ITE-RAI O AKATOKAMANAVA.

TAVINI I TE EKALEZIA AVARUA

I TE MATAITI 1943, KUA AKATOMOIA A PAPA MAEVA KARATI KI ROTO I TE EKALEZIA KIMIANGATAU I RUNGA I TE ENUA O AKATOKAMANAVA. I TE REIRA TUATAU E TAI NGAURU MA RUA O PAPA MAEVA MATAITI. I TE MATAITI 1946 KUA TERE MAI A PAPA MAEVA KI RAROTONGA E KUA RIRO EI MEMA EKALEZIA NO AVARUA. IAIA I ROTO TE EKALEZIA, KUA TOMO ATU KI ROTO I TE PUTUPUTU'ANGA BOYS' BRIGADE, PERA KATOA I TE PUTUPUTU'ANGA IMENE ARII SABATI (CHOIR) I RARO AKE I TE AKATERETERE'ANGA A TE OROMETUA REV. TA UPU PERE. KUA IKI KATOAIA MAI AIA EI TAUTURU TEKERETERE NO TE EKALEZIA AVARUA.

TAVINI I TE EKALEZIA I ROTO I TE TAPERE TAKUVAINI

I TE MATAITI 1973, KUA IKIIA MAI A PAPA MAEVA KI RUNGA I TE TAONGA TAUTURU DIAKONO NO TE EKALEZIA TAKUVAINI. E TAI NGAURU MA VARU MATAITI O PAPA MAEVA KI RUNGA I TE TAONGA TAUTURU DIAKONO. I TE MATAITI 1991 KUA AKATAINUIA A PAPA MAEVA EI DIAKONO NO TAKUVAINI. I TE MATAITI 2003 KUA AKANGAROI MAI A PAPA MAEVA NO RUNGA I TE TAONGA DIAKONO, KUA TUKU IATU KI RUNGA I TE TAONGA ELDER NO TAKUVAINI E TAE UA MAI KI TEIA ATIANGA E TE MAROIROI NEI RAI I TE RAVE I TE ANGAANGA NA TE ATUA. KUA RAVE KATOA AIA I TE ANGAANGA TAVINI I TE ATUA NA ROTO I TE RIRO MAI ANGA EI PUAPII ARII SABATI I ROTO I TE EKALEZIA TAKUVAINI, E PERA E METUA MAROIROI I TE AKARURU MAI I TE ANAU MAPU O TAKUVAINI, E METUA MEITAKI. KUA RIRO KATOA E NANA E ATU ANA I TETAU AU IMENE METUA ME KARE IMENE TUKI I ROTO I TE EKALEZIA.

TE AU ANGAANGA I ROTO I TE KAVAMANI KUKI AIRANI

I ROTO I TE MATAITI 1962 KUA IKIIA MAI A PAPA MAEVA EI TAUTURU PUAPII NO AVARUA SCHOOL. E TAI RAI ONA MATAITI KI RUNGA I TE TAONGA TAUTURU PUAPII. KIA TAE KI TE MATAITI 1963,

KUA IKIIA MAI AIA EI PUAPII MAATA NO TE ARII TUATAI O MATAVERA.

KIA TAE KI TE MATAITI 1966, KUA TUKUIA A PAPA MAEVA KI TE UNIVERSITY PALMESTON NORTH I NUTI RENI (NZ), OKOTAI RAI MATAITI. E KIA TAE MAI AIA KI RAROTONGA NEI I TE MATAITI 1967, KUA TUKUIA ATU A PAPA MAEVA EI PUAPII KI TEREORA. MEI REIRA KI MANGAIA HIGH SCHOOL. 1973, OKI MAI KI TEREORA. I TE MATAITI 1991, AKANGAROI MAI MEI TE ANGAANGA PUAPII. INARA TE RAVE NEI RAI A PAPA MAEVA I TETAU AU ANGAANGA RIKIRIKI NO TE ARII.

TURANGA I RUNGA I TE ENUA

KO PAPA MAEVA KUA TUPU MAI AIA MEI ROTO MAI I TE UANGA MATAIAPU, MEI TE ENUA MAI KO AKATOKAMANAVA, NO ROTO KATOA MAI AIA I TE UANGA ARIKI. MATAITI 1990, KUA MOU A PAPA MAEVA I TE TAONGA MATAKEUKEU MATAIAPU, I ROTO IA NGATI PUTUA. I TE MATAITI 2004, KUA AKAUURUUIA A PAPA MAEVA KI RUNGA I TE TAONGA TARARO ARIKI NO TE ENUA KO AKATOKAMANAVA, E TAE UA MAI KI TEIA RA.

E TAUNGA KORERO

KUA RIRO KATOA A PAPA MAEVA EI TANGATA ATU IMENE. KUA KITEA MAI TE KORERO I ROTO I TONA NGAKAU, E MEITAKI MAATA TEI KITEA MAI, E KUA RIRO TE REIRA I TE TAUTURU I TETAU AU PUTUPUTU ANGA MOU KORERO I TEIA TUATAU I ROTO NEI TE KUKI AIRANI. KARE A PAPA MAEVA I TAPU I TONA KITE ME KARE KARAPE. NO RUNGA I TE AKAKITE KORERO KUA TUKU AIA KI ROTO I TE KUKI AIRANI MA TE TAPU-KORE.

TANA AU TAMARIKI

I ROTO I TE ORAANGA O PAPA MAEVA E TONA AKAPEREPERE, E TAI NGAURU MA TORU A RAUA TAMARIKI, E VARU TAMAROA E RIMA TAMAINI. KO TA RAUA AU MOKOPUNA KUA ARAATU KI TE TAI NGARU MA RUA E TE ORA NEI RATOU KATOATO A I TE IA RA. I ROTO KATOA I TANA AU TAMARIKI, E OKOTAI RAI TAMA KUA RAUKA IAIA TE MOU MAI I TE KORERO A TONA METUA, KOIA OKI KO RAEMAKI KARATI. KUA KITE AIA I TE TARENI KORERO A TONA METUA TANE I ROTO I TONA NGAKAU E TE RAVE NEI A MAKI I TE REIRA.

TE AKAPEREPERE O PAPA MAEVA

I TE MATAITI 1999 I TE RĀ TAI NGAURU MA ONO (16) NO ME, KUA TAKAKE ATU TE AKAPEREPERE O PAPA MAEVA KOIA KO TEATA KURAKURA O TE RA. E 63 O'NA MATAITI I TE REIRA TUATAU, E METUA VAINI METAKI I TE TAUTURU I TONA TOKORUA I TE AU ANGAANGA KATOATO A.

KIA ORANA E KIA MANUIA.

**Responsibilities for this issue of the newsletter:**

- ◆ Editor/typist/format-layout - Nga Mataio
- ◆ Proof reading - Marianna Mataio
- ◆ Printing - Tekura (Steak) Potoru, Jimmy Metuakore
- ◆ Electronic mail (email) - Nga Mitiau-Manavaikai
- ◆ Contributors with articles - Oki Teokoitu, Rongo Taia, Rev. Rakoroa Taia, Steak Potoru

Comments on the format and presentation are most welcome; please send them to the Editor.